

## Beba umrla zbog blokade saobraćaja u Sarajevu?

Jednogodišnje dijete u Sarajevu preminulo je 5. marta zbog gušenja, a nakon što je progutalo gumenu lopticu. Kako saznaje agencija Patria, ljekari djetetu nisu mogli pomoći jer je vozilo Hitne pomoći na putu do kuće nesrećene porodice bilo zaustavljeno zbog blokade saobraćaja tokom protesta u glavnom gradu BiH. U tim trenucima ljekari i roditelji djeteta u dramatičnom pokušaju spašavanja života izašli su i trčali jedni prema drugima.

**Radio 8**  
FM 106,8 MHz



Uprkos naporima ljekara, kako saznajemo, tragedija nije mogla biti spriječena. Prema službenom policijskom izvještaju, saobraćaj u glavnom gradu je taj dan zbog protesta bio blokiran do 18 sati, a sve se odvijalo upravo u to vrijeme.

Kako je zvanično rečeno agenciji Patria iz Hitne pomoći, 5. marta u 18 sati je primljen poziv da je u jednoj sarajevskoj ulici u centru grada malo dijete progutalo strano tijelo, i da ne daje znakove života.

``Odmah po prijemu poziva, ekipa je krenula ka adresi i za pet minuta je bila u blizini mjesta događaja, ali onda nailazi na blokiran saobraćaj te se ekipa odlučuje da uz ulicu krene pješke. U susret je dotrčala majka noseći dijete``, kazali su nam ljekari.

Reanimacija je, kako nam je preneseno, nastavljena te je odlučeno da se odmah prebaci u Opću bolnicu ``Prim. dr. Abdulah Nakaš`` zbog blizine i zbog raspoloživosti anesteziologa i specijaliste otorinolaringologa. Nažalost, kako nam je kazala dr. Sena Softić-Taljanović, direktorica Hitne pomoći u Sarajevu u 18 i 50 reanimacija nije uspjela i konstatirana je smrt.

``Borili su se svih 45 minuta. Jako teško moja ekipa je podnijela ovaj slučaj, te su neki nakon toga otišli i na bolovanje. Stigli smo na vrijeme, uprkos tome što su ljekari morali napustiti vozila i krenuti pješke. Ne treba nikoga kriviti niti osuđivati unaprijed``, kaže ona.

Prema policijskom biltenu, 5. marta, dva dana nakon što je policija odlučnom akcijom zaustavila višesedmične blokade centra grada, saobraćaj je bio blokiran do 18 sati.

``Dana 05.03.2014.godine u 12,00 sati, ispred zgrade Predsjedništva Bosne i Hercegovine okupilo se oko 100 građana, kojima se u 13,40 sati pridružilo oko 30 taksi vozača bez odgovarajuće licence. Za vrijeme protesta saobraćaj je bio obustavljen na raskrsnicama ulica: Alipašina - Maršala Tita - Hamze Hume, Terezija - Skenderija, Reisa Džemaludina Čauševića - Obala Kulina Bana, općina Centar Sarajevo u vremenskom periodu od 12,30 - 18,00 sati, nakon čega su se građani razišli``, navodi se u policijskom biltenu.

Izvor: Radiosarajevo.ba